



DR. MASZLEE SARAN MAHASISWA PELBAGAIKAN PLATFORM SUMBANGAN

Oleh : Nurul Aida Othman

Pauh Putra, 23 September – Menteri Pendidikan Malaysia, Yang Berhormat Dr. Maszlee Malek menyarankan agar mahasiswa merebut peluang dan menggunakan masa di universiti sebaik mungkin untuk memperbagaikan platform dalam memberi sumbangan secara proaktif kepada masyarakat dan negara.

"Berikanlah sumbangan optimum dalam pelbagai aktiviti kokurikulum dan pada masa yang sama meneruskan pencapaian cemerlang dalam bidang akademik.

"Ini kerana masyarakat akan sentiasa menilai kualiti graduan yang dihasilkan oleh pendidikan tinggi Negara," katanya ketika berucap di hadapan tokoh mahasiswa pada Majlis Anugerah Tokoh Siswa (ATS) di Dewan Ilmu, UniMAP Pauh Putra.

"Penilaian ini secara tidak langsung menggambarkan kualiti diri mahasiswa sebagai seorang pemimpin. "Maka, wajar mahasiswa mencorakkan diri masing-masing untuk menjadi pemimpin negara di masa hadapan," katanya.

Tambah Dr Maszlee lagi dengan langkah progresif KPM yang menjadikan universiti sebagai medan intelektual terbuka akan memberikan kesan positif kepada mahasiswa melalui wacana ilmiah yang digerakkan oleh ahli akademik di universiti.

"Hasilnya mahasiswa cemerlang akan menjadi ikon dan duta kecil kepada semua lapisan masyarakat dan peringkat sekolah hinggalah ke peringkat antarabangsa. Malah dengan slogan love, happiness dan mutual respect yang sering tekankan, beliau berharap agar mahasiswa mengaplikasikannya dalam kehidupan seharian di kampus.

Pada majlis yang sama, sebanyak 14 kategori individu, satu kategori pasukan dan satu anugerah utama iaitu Anugerah Tokoh Siswa Kebangsaan disampaikan kepada para pemenang terpilih berdasarkan kriteria yang ditetapkan oleh KPM.

Anugerah Tokoh Siswa 'Tokoh Siswa Kebangsaan' telah dinobatkan kepada mahasiswa dari Universiti Islam Antarabangsa Malaysia (UIAM), Fatim Azzahra Lokman. Malah Fatim Azzahra turut memenangi Anugerah Pemimpin Majlis Perwakilan Pelajar. Beliau membawa pulang RM 3000.00 bagi anugerah utama dan RM 1000.00 dan biasiswa tokoh siswa bagi anugerah individu beserta trofi dan sijil.

Bagi penerima anugerah lain, mereka masing-masing menerima RM 1000.00, biasiswa tokoh siswa, trofi dan sijil. Dr Maszlee dalam ucapannya turut menyebut bahawa pemilihan tokoh pelajar adalah berdasarkan kecemerlangan dalam pengurusan organisasi serta penglibatan dalam program-program kepimpinan dan kesukarelawanan.

"Tokoh siswa ini terdiri dari mahasiswa yang memperoleh CGPA 3.0 dan ke atas serta mempunyai keperibadian dan sahsiah diri yang tinggi.

"Malah kadar keterlibatan Tokoh Siswa dalam sesuatu program turut diukur beserta tahap impak pelaksanaan program atau sumbangan mereka terhadap masyarakat," katanya.

Ujarnya lagi, ini adalah bagi memastikan tokoh yang dipilih adalah seorang tokoh yang mempunyai ciri-ciri personaliti unggul (towering personality) bagi mewakili IPT di peringkat kebangsaan dan antarabangsa.

